Universal Declaration of Human Rights - Kasem

© 1996 – 2009 The Office of the High Commissioner for Human Rights

This HTML version prepared by the UDHR in Unicode project, http://www.unicode.org/udhr.

LOGO BANA TIGISIM NABIINA NWE-LAO WADE

PULIM

De na se we nabiina ŋwea de logo baŋa chega chwoŋa wade maama kugu zege logo maama wopwolo, de chega de vezura baŋa ne.

De na sɛ we de na ba tɔge chega chwoŋa to mo jaane nikantɔgɔ de tigura de popɔra ko twi nabiina laŋa ne, ye nabiina maama yaa lage se wopwolo de yezura yaa taa wora.

De na se we noono maama taa tei o tete se tigura de popora ye taa wora, fefeo de peenem ŋwaane, se wade sem ja kuri.

De na se we teene maama taa jege wolim, de ni seem de mimərə.

De na sɛ we "UN Charter" tɔnɔ kom paŋe ko sɛ wadɛ sem ŋwea wolim ŋwaane se baara de kaana taa ye bedwe logo ywonni de wopwolo de yezura ŋwaane.

De na sɛ we UN Tigisim teene dem maama ke nimɔrɔ se chega chwoŋa wadɛ sem ja kuri nabiina zula de wopwolo ŋwaane.

De ta na se we ko yaa lamma lanyerane se de ni wade sento kuri se ko ja wopwolo de yezura ko ba logo baŋa.

De Laam wo se we

"General Assembly" dem pe

Logo Baŋa Tigisim Wadɛ sem se ko taa ye woŋ-kolo kodoo na wo woli ko ja wopwolo de logo fɔgem de yezura na wo pa nabiina ŋwea taa jege kuri logo baŋa maama ne to.

Wadaa 1

Ba loge nəəna maama se ba taa ye bedwe mo ba ŋwea de ba chega seini, ye fefeo teira kətaa. Wɛ pɛ ba swa de boboŋa mo se ba taa ye nubiu daane ye ba jege da ŋwaŋa.

Wadaa 2

Logo baŋa tigisim wade sem pe chwoŋa se nɔɔno maama taa jege chega chwoŋa na wo pa ba ŋwea taa jege zula to. Wade sem ta we ba ba fee nabiinu o chega chwoŋa ne naa ba cheese o dwi o yetana, o logo lane, o we jɔɔnɔ naa o boboŋa ŋwaane. Wade sem ta we ba ba jege se ba taa cheese nɔɔno we o ye baaro naa kaane, kwoo o jejegero naa ba na loge o me to ŋwaane.

Wade sem ta tage se woli da we popora ba jege se ka taa wora nabiina laŋa ne ba teo politiksi naa ko wade naa ko na ye kolo to ŋwaane. Naa ba poore noono we o nwoŋi teo kolo ta na wo vere ko tete to ŋwaane.

Wadaa 3

Ko ye noono maama chega chwona mo se o taa nwe ye fefeo naa foonee teira.

Wadaa 4

Wadaa kam we nabiin-yeiku naa kabe totona naa kabe pipio daa ye taa wora logo bana ne.

Wadaa 5

Ba ba jege chwona se ba pa nəəno yaare cham yerane ko na wo maŋe se nabiinu yaare tei to.

Wadaa 6

Nəəno maama ye nabiinu mo o ze paŋ o wo mɛ maama logo baŋa yoba. Logo baŋa wadɛ sem maama yiga ne, wadaa teira na wo ta we o dae nabiinu.

Wadaa 7

Nabiina maama ye bedwe mo wadaa yiga ne. Wadaa choo noono maama mo; ka ba poore noona ka yaga. Ka kwoli nabiina maama mo se wolo wolo ye cheese o dwon.

Wadaa 8

Nəəno maama wae o saŋ nəəno o dwoŋ kəəte delo maama wone nenɛɛne ko tu na ke o chəge teo kom wadɛ selo na pa nəəno wom ŋwea ywona to.

Wadaa 9

Ba baa wane ba ja noono yoo yerane ba gare ba ke o peena diga naa ba zeili o o teo ne pa o vo zoora te-gaa ne.

Wadaa 10

Ba na jaane noono fee wora se ba di o sareya koote ne lanyerane ko maŋ de teo kom wadɛ na tiŋi tei to ba ni o seene o choge naa o wo choge.

Wadaa 11

- 1. Ba na jaane noono we o choge o mane waarem ba na wo di o bora tata ba ba jege chwona ba te we choge fee wora se ba pa ko tu chwona se o ja loya de sareya tiina se ba woli o se ba di taane dem koote ne.
- 2. Ba baa wane ba ta we noono yaa ke o choge naa ba ta we o ve se o yaa ke kolo na maŋe keim chega chwoŋa ne to, ye ka maŋa ne wadaa yaa teira ko ŋwaane. Ko kwaga ne tata ba baa wane ba pa noono waarem na dage de dwoi waarem delo dwi o deim yaa na wo jwoŋ o na choge maŋa kalo to.

Wadaa 12

Ba ba jege chwoŋa ba daane nɔɔno yɔɔ yerane o boboŋa keiri seini, naa o diga tiina, naa o sɔŋɔ de o pwola totoŋa seini. Ba nam ba jege chwoŋa ba ke o kekeo kolo na wo chɔge nɔɔno wom yu to. Wadaa kanto choo nɔɔno maama mo o kekeo maama seini, ye daanem teira.

Wadaa 13

- 1. Nəəno maama wae o beiri o boboqa na lage tei ye o zoore o boboqa na lage me maama to, o teo ne.
- 2. Nəəno maama wae o nwoŋ teo de teo, naa o tete teo ne o beiri o vei teo kodwoŋ ye o jwoora.

Wadaa 14

1. Noono wolo maama na ne chem o teo ne, o wane o duri o vo o taa zoore sateene dedwonna ne o wopwolo de yezura ŋwaane.

2. De ko de, o cham dem na dae neneene politiksi laŋa ne ko wo taa chamma se o duri o nwoŋ. O na chɔge teo kom wadɛ gɛ mo naa o kekeo kom na wo dɛ UN wadɛ sem na maŋe tei to sateene dedwonna baa sɛ de jwoŋ o mɔle mɔle.

Wadaa 15

- 1. Nəəno maama jege teo, o na nwoŋ mɛ.
- 2. Ba baa wane ba zeili nəəno o teo ne, naa ba fee o se o ye leiri teo o bobona na lage tei to.

Wadaa 16

- 1. Baara de kaana na bege ba ti to wae ba di daane ye ba yetana, naa ba na nwoŋ tekolo, naa ba na tɔge Wɛchoŋa kalo dwi to baa wane ko cheiŋi ba se ba ye di daane ba lɔ sɔŋɔ. Ye ba kadiri seini ba maama ma daane, ba zora de ba ŋwea seini, ye ba wae ba yage daane maŋa de maŋa, ba tete boboŋa na lage tei.
- 2. Kadiri wio ye baaro de kaane tete yerane na sɛ se ba zo daane, ye ko dae we nɔɔno mo fee ba to.
- 3. Ѕэŋɔ tiina baaro de o kaane de o bu mo ye sayu kugu takeiri wone. Konto ŋwaane tekeiri dem de teo kom maama jege se ba taa ni ba baŋa ne mo, ba taa choo ba wolwanno maama wone.

Wadaa 17

- 1. Nəəno maama wae o jege o tete nyəəne wonno, naa o de o badwonna wae ba tei wonno daane.
- 2. Ba baa wane ba vere noono wonno naa ba pa se o ye taa lage wonno.

Wadaa 18

Nəəno maama wae o boŋ o na lage tei. O wae o ke o boboŋa keiri, o wae o təge Wechwoŋa kalo dwi o na lage to; o nam ta wae o leiri o Wechwoŋa naa o boŋem o yerane naa o de kəgə, ye o bere nəəna Wechwoŋa kam o taane de o totoŋa seini.

Wadaa 19

Nəəno wae o ŋəəne o boboŋa na lage tei. O wae o tɛ kolo maama o na boŋe o yu ne, ye nəəno ba jege chwoŋa se o cheiŋi o ni. O wae o beiri labaare o boboŋa o daare o pae labaare dwi maama labaare tənno de walese bam maama wone se de jage jei mamma.

Wadaa 20

- 1. Nəəno maama wae o təge o zoore asemble naa tigisim dwi maama na ye yezura tigisim to.
- 2. Ba baa wane ba fee nəəno se o zo tigisim delo o na ba lage to.

Wadaa 21

- 1. Nəəno maama wae o təge o di o teo gəmente paare; o nam ta wae o təge o voti o kuri nəəna o ke gəmente dem wone.
- 2. Nəəno maama wae o jwoŋ wolim delo o teo gəmente na jege de woli de nəənbia maama to, ko ma da ko ma da.
- 3. Gəmente maama dam wo taa təge de nəənbia kwora na we tei to mo. Nəənbia bam kwora kam mo yei ni ka bere nəənbia bam na wo kuri ba gəmente dem paare tiina tei to. Kurim dem jege se ko dɛ voti lao naga mo, se nəəno maama voti o bobona na laga tei to, ye se ko dɛ voti wadaa kam naga chekke.

Wadaa 22

Noono maama teo gomente jege se de taa choo o ŋwea laŋa ne de de dam, de de naduni dedaane de na jege nimoro tei de sateene dedwonna to se ko pa noono wom ŋwea ja kuri se o wane o ji noono lanyerane.

Waada 23

- 1. Nəəno maama wae o ke totoŋ; o wae o kuri o boboŋa na dɛ totoŋ delo, ye fee wora se totoŋ dem taa jege kuri na pa o ywonni de wopwolo ye o ba lia we ba wo zaŋ ba le o totoŋ dem ne to.
- 2. Noono maama ka, ye ko ba chuli o na ye wolo dwi to, jege se o taa jwoŋ ŋweo na mae de o totoŋ dem dam na mae tei to mo.
- 3. Wolo maama na toŋa ko maŋ se o ŋweo taa ye zegere se ko wane ko ni o tete dedaane o diga tiina lanyerane. Ko ta maŋ se o taa nɛ fee o totoŋa jei ne.
- 4. Nəəno maama wae o təge o zoore totoŋa jei tigisim yalo na wo woli o o totoŋa laŋa seini to.

Wadaa 24

Nəəno maama jege chwoŋa se o taa jege sio de sio maŋa, dedaane hawase bagera o na o ke totoŋa jei ne to; ye o ta wae o jwoŋ daa bem wone o jeini səŋə ne o sia ye ba baa le o ŋweo wone.

Wadaa 25

- 1. Fee wora se nɔɔno maama taa ŋwe ŋwea na jege kuri ye ka ywoma ka pae o tete de o diga tiina to. Ko maŋe se wodiiru, zora jei, assibita na ni yezura seini to dedaane won-telo maama na wo woli pa se ŋwea taa ywoma to taa wora. Fee ta mo wora se wolim taa wora ko pae nɔɔno maama nenɛɛne o na ba toŋa, o na weela, naa o na jigi nabwom jaweo ŋwaane, o na ye badeim naa kadeim, o na kwe naa nɔɔno na ye zore tu, o ware se o ni o tete baŋa ne.
- 2. Fee wora se ba taa fage ba ni niina de bia baŋa ne lanyerane. Bu maama, o jege kwo yoo o ba jege kwo yoo, ko maŋe se ba ni o baŋe ne mo ba woli o se o ke nɔɔno.

Wadaa 26

- 1. Nəəno maama jege choŋa se o ke sikuuli. Sikuuli veiŋa, ko zege prameiri sikuuli ko vo yi Junia Sɛkondeiri Sikuuli, wo taa ye zɛɛra mo, ye ko ta ye fefeo mo se bu maama vo sikuuli se ko yi konto. Tɛkenekal Sikuula de totoŋa berem sikuula nenɛɛne Kəleja de wo taa wora se balo na wo vo da to vo. Univɛsiti de sikuula kamuna yadwonna de wo taa wora se balo na paase ba tɛɛsa lanyerane to vo.
- 2. Sikuuli veiŋa naa tɔn-yeino ye se ko pa nɔɔno swa mo poore se o wane o lɔre kolo maama na lana ko pa nabiino se ko ja wopwolo de yezura ko ba to. Ko jege se ko ja nimɔrɔ de badwoŋo mo ko ba de sateene logo baŋa ne, de nabiina dwi maama de wejɔɔna dwi maama se ko zeini logo baŋa tigisim totoŋa dwi maama na woli logo maama yezura to.
- 3. Tiina jege chwoŋa se ba kuri ba na wo taa lage se ba bia zamese tənə sikuuli delo dwi wone to.

Wadaa 27

- 1. Nɔɔno maama wae o tɔge o ke o nabaara kekeo o na lage tei, de keina yadwonna, de "Science" na jaane wodonno telo maama ko ba nabiina jirim naa wolim ηwaane to.
- 2. Noono maama na popone o tono o na yei kolo maama logo lam ŋwaane to, fee wora se ba zeini naa ba woli o se o ne ko maana.

Wadaa 28

"United Nations" nia yanto ye se ko pa nabiino maama logo baŋa wolim, de wopwolo de yezura mo.

Wadaa 29

- 1. Nəəno maama jege fee totoqa se o ke o na zoore takeiri delo maama ne to se ko pa se o taa ye nəən-ŋwem se o ŋwea ke ywonni.
- 2. Nəəno fee totona keiri wone o jege se o dɛ wadɛ sem na lage tei to mo. O ba jege se o ke o gaale naa o ke o chəge badwonna wo. O nam ba jege chwona o ke o chəge kəgə ywonni de nəəno wopwolo, kəgə zula ŋwaane.
- 3. Noono maama na toge nabiina ŋwea de logo baŋa chega chwoŋa wadɛ sento o jege se o toge "United Nations" na lage se ko dɛ tei to mo.

Wadaa 30

Noono, naa noona, naa teo ye zaŋ ba boŋe we ba wo wane ba ke woŋo se ko leiri naa ko choge nia yanto ba na tiŋ tono konto ne to.